

NACRT

Na osnovu člana 22 Statuta Brčko distrikta Bosne i Hercegovine - prečišćeni tekst („Službeni glasnik Brčko distrikta Bosne i Hercegovine, broj: 2/10), Skupština Brčko distrikta Bosne i Hercegovine na ____ sjednici, održanoj dana ____ godine, usvaja

ZAKON O IZMJENAMA I DOPUNAMA ZAKONA O VANPARNIČNOM POSTUPKU BRČKO DISTRIKTA BIH

Član 1

U Zakonu o vanparničnom postupku Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 5/01 i 36/17), član 12 mijenja se i glasi:

„Član 12

(1) U postupku u kome se odlučuje o ličnim i porodičnim stanjima učesnika Osnovni sud postupaće ukoliko lice u čijem interesu se postupak vodi ima prebivalište ili boravište u Distriktu, ako zakonom nije drugačije određeno.

(2) U drugim vanparničnim stvarima Osnovni sud postupaće ukoliko predlagač ima prebivalište ili boravište, odnosno sjedište u Distriktu, ako zakonom nije drugačije određeno.

(3) Kada se u vanparničnom postupku odlučuje o nekretninama, Osnovni sud postupa ukoliko se nekretnine nalaze na području Distrikta.“

Član 2

Član 16 mijenja se i glasi:

„Član 16

(1) Protiv rješenja Osnovnog suda može se izjaviti žalba Apelacionom sudu u roku od 8 dana od dana dostavljanja rješenja, ako ovim ili drugim zakonom nije drugačije određeno.

(2) Žalba zadržava izvršenje rješenja, ukoliko ovim ili drugim zakonom nije drugačije određeno.“

Član 3

Član 24 mijenja se i glasi:

„Član 24

U vanparničnom postupku protiv pravosnažnog rješenja donesenog u drugom stepenu, dopuštena je revizija pod uslovima predviđenim Zakonom o parničnom postupku, ako ovim ili drugim zakonom nije drugačije određeno.“

Član 4

Član 25 mijenja se i glasi:

„Član 25

(1) Po prijedlogu za ponavljanje postupka prethodno će se postupiti kao po neblagovremeno podnesenoj žalbi, ako postoje uslovi iz člana 18 ovog zakona da drugostepeni sud odluči i o osnovanosti neblagovremeno podnesene žalbe.

(2) Ukoliko drugostepeni sud nađe da uslovi iz stava (1) ovog člana ne postoje vratiće predmet prvostepenom sudu radi postupanja po prijedlogu.

(3) Protiv rješenja kojim je postupak pravosnažno završen, prijedlog za ponavljanje postupka ne može se podnijeti ako je učesniku ovim ili drugim zakonom priznato pravo da zahtjev o kojem je rješenjem odlučeno ostvaruje u parnici ili u postupku pred organom uprave.“

Član 5

U glavi II „Uređenje ličnih stanja“ poslije člana 70 dodaje se novi Odjeljak 3a. i novi čl. 70a, 70b, 70c, 70d, 70e, 70f, 70g, 70h, 70i, 70j i 70k, koji glase:
"3a. Utvrđivanje mjesta i vremena rođenja“.

Član 70a

Prijedlog za utvrđivanje vremena i mjesta rođenja sudu može podnijeti:

- a) lice koje nije upisano u matičnu knjigu rođenih, a vrijeme i mjesto svog rođenja ne može dokazati na način predviđen propisima kojima se uređuje vođenje matičnih knjiga,
- b) organ starateljstva,
- c) svako lice koje za to ima pravni interes.

Član 70b

(1) Prijedlog za utvrđivanje vremena i mjesta rođenja sadrži slijedeće podatke o licu čije se vrijeme i mjesto rođenja dokazuje:

- a) ime i prezime,
- b) pol,
- c) vrijeme i mjesto njegovog rođenja, ako je poznato,
- d) druge činjenice koje mogu biti od koristi za utvrđivanje vremena i mjesta rođenja.

(2) Ako je prijedlog iz stava (1) ovog člana podnijelo lice iz člana 70a tačka c) ovog zakona, prijedlog sadrži podatke iz kojih proizilazi da predlagač ima pravni interes za pokretanje postupka utvrđivanja vremena i mjesta rođenja.

(3) Uz prijedlog iz stava (1) ovog člana dostavljaju se i dokazi kojima se činjenice iz stava (1) i (2) ovog člana mogu utvrditi ili učiniti vjerovatnim.

Član 70c

(1) Prije zakazivanja ročišta sud pribavlja izvještaje od policije, odnosno, ministarstva nadležnog za unutrašnje poslove i matičnog ureda na čijem području je boravilo lice čije se vrijeme i mjesto rođenja dokazuje o tome da li u njihovim evidencijama postoje podaci o vremenu i mjestu rođenja tog lica.

(2) Sud može zatražiti izvještaj i potrebna obavještenja i od drugih organa i ustanova koje vode evidencije o fizičkim licima.

(3) Rok za dostavljanje izvještaja iz stava (1) i (2) ne može biti duži od 30 dana od dana prijema zahtjeva suda.

(4) Ako izvještaj iz stava (1) ovog člana sudu ne bude dostavljen u ostavljenom roku, smatra se da o licu čije se vrijeme i mjesto rođenja dokazuje nema podataka u evidencijama organa od kojih je zatraženo da izvrše provjeru.

(5) Ako ima nagovještaja da je lice čije se vrijeme i mjesto rođenja dokazuje imalo boravište u stranoj državi, sud donosi rješenje o prekidu postupka dok ne pribavi potrebna obavještenja od nadležnih organa strane države u skladu sa pravilima o međunarodnoj pravnoj pomoći.

Član 70d

(1) Na ročište za utvrđivanje vremena i mjesta rođenja lica sud poziva predlagača i lice čije se vrijeme i mjesto rođenja dokazuje i izvodi potrebne dokaze.

(2) Da bi se utvrdilo vrijeme i mjesto rođenja lica, sud mora saslušati najmanje dva punoljetna svjedoka čiji identitet utvrđuje uvidom u javnu ispravu s fotografijom.

(3) Sud će odrediti da sudski vještak odgovarajuće specijalnosti pregleda lice čije se vrijeme i mjesto rođenja dokazuje i dâ nalaz i mišljenje o njegovim godinama života.

Član 70e

Rješenje kojim se utvrđuje vrijeme i mjesto rođenja sadrži slijedeće podatke o licu čije se vrijeme i mjesto rođenja dokazuje:

- a) ime i prezime,
- b) pol,
- c) dan, mjesec, godinu i čas rođenja,
- d) mjesto rođenja i
- e) podatke o njegovim roditeljima, ako su poznati.

Član 70f

Ako sud na osnovu izvedenih dokaza ne može sa sigurnošću utvrditi kada je rođeno lice čije se vrijeme i mjesto rođenja dokazuje, smatra se da je ono rođeno 1. januara u 00:01 h one godine za koju se na osnovu izvedenih dokaza može uzeti da je izvjesna godina rođenja.

Član 70g

Ako sud na osnovu izvedenih dokaza ne može sa sigurnošću utvrditi gdje je rođeno lice čije se rođenje dokazuje, kao mjesto rođenja smatra se sjedište grada, odnosno opštine za koju se na osnovu izvedenih dokaza može uzeti da je izvjesno mjesto rođenja, a ako se mjesto rođenja ne može utvrditi na takav način, smatra se da je lice čije se vrijeme i mjesto rođenja dokazuje rođeno u mjestu gdje je nađeno, odnosno gdje je imalo boravište u vrijeme podnošenja prijedloga za utvrđivanje vremena i mjesta rođenja.

Član 70h

(1) Rješenje o vremenu i mjestu rođenja lica sud je dužan donijeti u roku od 90 dana od dana podnošenja prijedloga.

(2) Protiv rješenja iz stava (1) ovog člana može se izjaviti žalba Apelacionom sudu u roku od osam dana od dana prijema rješenja.

(3) Prvostepeni sud žalbu sa spisima bez odlaganja dostavlja drugostepenom sudu, koji je obavezan donijeti odluku u roku od 30 dana od dana prijema žalbe.

Član 70i

Troškove postupka za utvrđivanje vremena i mjesta rođenja lica snosi predlagač.

Član 70j

Pravosnažno rješenje o vremenu i mjestu rođenja lica prvostepeni sud dostavlja nadležnom matičnom uredu u roku od osam dana od dana pravosnažnosti rješenja radi upisa činjenice rođenja u matičnu knjigu rođenih.

Član 70k

(1) Ako se naknadno utvrdi da je lice čije se vrijeme i mjesto rođenja dokazuje već upisano u matičnu knjigu rođenih, Osnovni sud koji je donio rješenje o vremenu i mjestu rođenja po službenoj dužnosti provodi postupak stavljanja van snage tog rješenja.

(2) Pravosnažno rješenje o stavljanju van snage rješenja o vremenu i mjestu rođenja prvostepeni sud u roku od osam dana od dana pravosnažnosti rješenja dostavlja nadležnom matičnom uredu.

Član 6

Iza člana 156 naziv odjeljka: „4. Dioba stvari i nekretnina u zajedničkom suvlasništvu“ mijenja se i glasi: „4. Dioba stvari i nekretnina u suvlasništvu“.

Član 7

U članu 157 i članu 158 stav (1) riječi: „zajedničkom suvlasništvu“, zamjenjuju se riječju: „suvlasništvu“.

Član 8

Član 159 mijenja se i glasi:

„Član 159

(1) Ako sud, postupajući po prijedlogu, utvrdi da je među suvlasnicima sporno pravo na stvarima koja je predmet diobe ili pravo na imovini, da je sporna veličina udjela u stvarima, odnosno imovini u suvlasništvu ili je sporno koja imovina, odnosno prava ulaze u nekretninu u zajedničkom vlasništvu, prekinuće postupak i uputiti onog učesnika čije pravo smatra manje vjerovatnim da u roku od 15 dana pokrene parnicu.

(2) Ako učesnik postupka koji je upućen na parnicu u roku iz stava 1 ovog člana ne pokrene parnicu, Sud će nastaviti postupak diobe.“

Član 9

Član 168 se briše.

Član 10

Član 169 se briše.

Član 11

Ovaj zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine“.